

Áchtopa ʼama' yej kijkuiloj San Juan

*Tájtɔl yej kich̄iwa iga nochipa matonokan wan
Dios*

¹ Nejemej nimitzijkuilowiliáj de inón yej onoyay este kua' pewa' inochi, iwán yej nikakikej iwán ken iga niknojma-itakej iga noyixmej. Iwán nikchijchimikej iga nomamej. Nemi nimitzatapowiáj de inón Tájtɔl yej kich̄iwa iga wel matisatokan.* ² Inonwa' Tájtɔl Jesucristo yej kich̄iwa iga wel matisatokan, monextij. Iwán nejemen nikitakej iwán noyan nikpowakej; iwán nimitzpowiliáj no amejemen de inín yej kich̄iwa iga nochipa matonokan wan Dios. Inín Tájtɔl onoya iwán toTaj iwán yéj ne-ixnextilijkej. ³ Nimitzpowiliáj kensan nikitakej iwán kensan nikakikej, iga wel masetitokan kensan nejemen nisetitokej iwán Dios yej toTaj iwán Jesucristo yej iPiltzin Dios. ⁴ Nejemej nimitzijkuilowiliáj inín iga pox matiyolpaktokan.

Dios teperdonarowiliá iga tikchijkej yej ayékti

⁵ Ininwa' in ye'noticiaj yej Jesucristo nenextilijkej yej nejemej nimitzpowiliáj amejemen: Dios ayí' kich̄iwa yej ayékti, iga yéjwa' nokta tawilyo', kan yéj ono' ayá' takomichkan. ⁶ Siga tikj towaj iga tisetitokej

* **1:1** 1:1 "Matisatokan" o matonokan nochipa wan Dios.

iwán, iwán tikchíwajo' yej ayękti iga tonókejo' ken kan takomichkan, titakajkayawaj iga atikchíwaj ken itájtól Dios tanętiliá. ⁷ E' siga tinemij kan tawilpan, ijkón ken Dios ono' kan tawilpan, ijkón tisetitokej iwán nochi yej kicredowaj Cristo; iwán iyesyó Jesucristo yej iPiltzín Dios tepajpakiliá nochi yej tikchíwaj yej ayękti.

⁸ Siga tikjtowaj iga ayá' tikchijkej yej ayękti, toganájmejsan timokajkayawaj, iwán ayá' tikj-towaj yej melá' nokta. ⁹ E' siga timotęxitomaj iga tikchijkej yej ayękti, Dios nochipa kichíwa ken kjtowa iwán yejsan kajasi iga teelkawiliá iga tikchijkej yej ayękti, iwán wel teewiltiliá yej ayompa tikchijkej. ¹⁰ Siga tikjtowaj iga ayá' tikchijkej yej ayękti, nemi tikjtowaj iga Dios takajkayawa, iwán ijkón neši iga ayá' nemi tiktajtólkuij Dios.

2

Cristo yej tetajtowiliá

¹ Amejemen yej nimitzitaj ken nopilowan, nimitziykuilowiliáj inín iga amo xikchíwakan yej ayękti. E' siga agaj kichija' yej ayękti, tikpiáj se yej tetajtowiliá iyixtaj toTaj, inonwa' Jesucristo. Yéj ayí' kichíwa yej ayękti. ² Jesucristo motemá' iga mi' iga tejemej iga mateperdonarowili yej tikchijkej yej ayękti, ayejsan iga tejemej, nō iga inochi gente yej ono' ipan inín tajli.

³ Siga tikchíwaj ken Dios tatekimaka, ijkón tikmatij iga tikixmátija Dios. ⁴ E' siga agaj kjtowa: “Nej nikixmati Dios”, iwán ayá' kichíwa ken

yéj tatekimaka, inonwa' takajkayawa, ayompa tajlamiki. ⁵ E' kuá' tikchiwaj ken Dios tatekimaka, ompa monextiá iga tikchokiliáj nokta in Dios; iwán ijkón tikmatij iga tisetitokej iwán yéj. ⁶ Yej kijtowa iga setito' iwán Dios, manemi ken nemiá Jesucristo.

Se'pay tetekimaka Dios

⁷ Nokniwan, inín yej nimitzijkuilowiliáj iga xikchiwakan, ayéj se'pay yej tetekimaka Dios: inonsan yej amejemen ikyay mitztekimakakej iga xikchiwakan. Inín yej ikyay mitztekimakakej, amejemen ankikakíkeja. ⁸ E' malej ijkón, nimitzijkuilowiliáj se'pay iga nimitztekimakaj, wel tikjtowaj iga inín aya i' mokaki, iwán ankimatij iga ijkón nokta tamachtij Cristo iwán monextiá nō pan amejemen. Iga nōyanya nemi momati inín tájtōl, ken kuá' némiya tawíá nōyan iwán takomitilyo' nemi pojpoliwi.

⁹ Siga agaj kijtowa iga ono' ipan tawilyo', iwán kijiya iyiknīn, inón onogo' kan takomichkan.

¹⁰ Yej kichokiliá iyiknīn, inón ono' pan tawilyo', iwán akichiwaltíá iga se' makichíwa yej ayēkti.

¹¹ E' yej kijiya iyiknīn inón ono' kan takomichkan iwán nemi kan takomichkan iwán ayá' kimati kan yawi, iga takomitilyo' ken kixtzakto'.

¹² Nopilowan, nimitzijkuilowiliáj iga Dios mitzperdonarowilíjkeja nochi yej ankichijkej yej ayēkti, iga Cristo mi' iga amejemen.

¹³ Tetajwan, nimitzijkuilowiliáj amejemen porque ankixmátija Cristo yej onóyaya este kuá' aya onoya nité. Chokomej iwán takomej

nimitzijkuilowiliáj amejemen iga ankitañilijkej Tzitzimi'.

Nimitzijkuilowiliáj amejemen yej nimitzitaj ken nopilowantzitzin iga ankixmatikej toTaj. ¹⁴ Tetajwan, mitzijkuilowilijkej amejemen porque ankixmatij Cristo yej onóyaya kua' aya onoya nité. Nimitzijkuilowilijkej amejemen chokomej iwán takomej iga ankijyowiliáj iga annemij ipan iyojwi toTeko, iwán ipan amoalmajmej ankicredojskej itájtɔl Dios, iwán ankitañilijkej Tzitzimi'.

¹⁵ Amo xikyolmakakan iga xikchiwakan ken kichiway yej akixmatij Dios, niga mamitzyoltilanakan yej ono' ipan inin tajli. Siga tej tikyolmakato' iga tikchiwa yej ayekti yej ono' ipan inin tajli, awel tikchokiliá toTaj. ¹⁶ Iga nochi yej ayekti yej tenextiliá yej kichiway yej akixmatij Dios, yej mochiwa ipan inin tajli: ken yej teyoltilana yej ayekti, yej tikitaj wan tikpiasnekij, iwán iga timoweyimatij iga nochi yej tikpiáj. Nochi inin ayá' tenextiliá toTaj Dios. ¹⁷ E' inin tajli iwán nochi yej ono' yej ajayekti yej teyoltilana, yáwisan tamiti. E' yej kichijto' ken kineki Dios yawi onoti nochipa.

Wì'ya taga' yej kijiya Cristo

¹⁸ Nopilowan, ay'ya ke' poliwi kua' toTeko wì' tajuzgaroki. Amejemen ankikakikej iga wì' yej kijiya Cristo, iwán inán nesikoj mia' yej kijiyaj Cristo. Inón iga tikmatij iga ay'ya ke' poliwi iga wì' toTeko. ¹⁹ Inimej yej kijiyaj Cristo, de tejémempasan katka yej tiktokaj Cristo, e' kiskej iga ayéj katka de tejémempa. Porque siga de

tejemepa katka kawíaj iwán tejemej, e' ijkón mochiy iga manesi iga ayéj nochi de tejemej.

²⁰ Cristo mitzmakakej el Espíritu Santo, iwán amonochin amejemen ankixmátija itájtol Dios.

²¹ Nimitzijkuilowiliáj ayéj iga ayá' ankixmatij itájtol Dios yej melá' nokta, sino que iga ankixmatij, iwán amejemen ankimatij iga ni agaj awel takajkayawa yej kitoka itájtol Dios yej melá' nokta.

²² ¿A'yéj in yej takajkayawa? Inón yej kijtowa iga Jesús ayéj nokta Cristo, inonwa' in yej kijiya Cristo iga ono' icontraj ken kijtowa toTaj iwán tePiltzin. ²³ Yej ayá' kijtowa iga Jesús iPiltzin Dios, ayá' sennemi wan toTaj. E' yej kijtowa iga Jesús iPiltzin Dios, inón sennemi wan toTaj.

²⁴ Inón iga amejemen xikchijtokan kensan yej ikyay mitznextilijkej ye'noticiaj, iwán siga ankichijoskej ken kijtowa ye'noticiaj yej ikyay ankikakikej, ansetitoskej wan tePiltzin iwán toTaj. ²⁵ Ininya in yej te-ijlij Cristo: Iga nochipa tonoskej wan yéj.

²⁶ Inín nimitzijkuilowilijkej iga amo xiktajtolkukan inomej yej takajkayawaj. ²⁷ E' amejemen ankipiáj el Espíritu Santo yej Jesucristo mitzmakakej, iwán ay' ankinekij iga se' mamitzmachtikan, porque el Espíritu mitznextiliáj nochi iwán yej yéj mitznextiliáj ijkonya nokta. Xisetitokan iwán Cristo ijkón ken el Espíritu mitznextilijkej.

²⁸ Inán nopilowan, xisetitokan iwán Cristo iga ijkón ayá' timajmawiskej kuá' yéj nesiki, ayá' timopinajtiskej kuá' wí'. ²⁹ Iga amejemej ankimatij iga Jesucristo nochipa kichíwa yej yékti,

iwán xikmatikan iga nochi yej kichiwaj yej yekti inomej sí, ipilowan Dios.

3

Ipilowan Dios

¹ Xikitakan ken iga tepoxchokiliá Dios yej toTaj, iga te-ijliá iga tejemej ipilowan yéj, melá' iga ijkón. Inón iga, yej ayá' kitokaj toTeko iyojwi, ayá' te-ixmatij iga ayá' kixmatij Dios.

² Nokniwan yej nimitzpozchokiliáj, inán tejemej ipilowanya Dios, malej iga aya tikmatij kenya tonoskej inón vej. E' tikmatij iga kuá' nesiki Cristo timochiwaskej ken yéj, porque tikitaskaj ken nokta in yéj. ³ Iwán nochi yej kichixto' iga Dios inón kichiwaj, kitemowa iga makichywa yej Dios kineki, ijkón ken Cristo nochipa kichywa yej yekti.

⁴ E' nochi yej kichywa yej ayekti, akichywa ken kijtowa iley Dios porque yej kichywa yej ayekti ayá' kitoka iley Dios. ⁵ Amejemen anki-matij iga Jesucristo walaj ipan inín tajli iga tepardonarowiliko yej tikchijkej yej ayekti, iwán yéj ayí' kichij yej ayekti. ⁶ Inón iga nochi yej nochipa setito' iwán yéj, ay' wel kichijos yej ayekti; e' nochi yej kichywa yej ayekti, akicredowa Cristo, niga kixmati. ⁷ Nopilowan, amo agaj mamitzkajkawakan; yej kichijto' yej yekti, inón ye'nemi, kensan Jesús kichywa yej yekti. ⁸ Yej kichijto' yej ayekti inonwa' kitoka Tzitzimi', iga Tzitzimi' este ikayay pewa' iga kichijto' yej ayekti. E' iPiltzin Dios walaj nokta iga makipolo yej kichijto' Tzitzimi'.

⁹ Ni agaj yej ipilówampa Dios kichíjto'san yej ayękti, iga kichíjto'ya ken kijtowa itájtól Dios, iwán awel kichijos yej ayękti, iga Diosya ipiltzın. ¹⁰ Momati a'yéj in ipilowan Dios iwán a'yéj in ipilowan Tzitzimi', iga nochi yej ayá' kichijto' yej yękti iwán ayá' kichokiliá iyiknın, inón ayéj ipiltzın Dios.

Matimosepanchokilikın

¹¹ İnınwa' in ye'notıciay yej ikıyay ankıkak-tiwıtzej: iga matimosepanchokilikın. ¹² Amo matikchiwakan ken Caın iga yéj kichij ken kineki Tzitzimi' iwán kimiktij iyiknın. ¿Iwán te iga kimiktij? Iga Caın ayompa nemiá, iwán iyiknın ye'nemiá.

¹³ Nokniwan, siga mitzijiıyay yej akitokaj iy-ojwi Dios, inón amo xikitakan ken tejté yej aya ankimatij. ¹⁴ Tejemej timiktóyaja iwán ti-ojpa-isákeja; inón tikmatij iga tikchokiliáj tokniwan. Yej ayá' kichokiliá iyiknın, inón ken kuá' mıktoıo'. ¹⁵ Nochi yej kijiya iyiknın, inonwa' ken kuá' tamiktiá, iwán amejemej anki-matij iga nochi yej tamiktiá, inón ayı' wel onos wan Dios. ¹⁶ Tikmatij ken iga matimochokilikın, ken Jesucristo tenęxtilij kuá' migui' iga tejemej. Ijkonsan no tejemej, matikchokilikın tokniwan este wel matimikikan iga yejemej. ¹⁷ Siga se toknın motapialiá wan kita se toknın yej kineki iga mamopalewi, iwán siga inón yej motapialiá ayá' kipalewiá, ¿kén wel kijtoj iga tachokiliá ken kichiwa Dios? ¹⁸ Nopilowan, amo matikijtókansan iga timochokiliáj, sino que mamela'nesi iga timochokiliáj.

Wel tiknə'techowaj Dios

¹⁹ Ijkón iga tikchokiliáj toknimej, wel tikmatij iga ómpaya ken tinemij, iwán wel tikmatij iga tiye'onokej iyixtaj Dios. ²⁰ E' siga toalmaj te-ijliá iga tikchijkej yej ayekti, Dios máj kimati que toalmaj, iga yéj nochi kimati. ²¹ Nokniwan yej nimitzpoxchokiliáj, siga toalmaj te-ijliá iga ayá' tikchijtokej yej ayekti, atimajmawij iga tiknə'techowaj Dios. ²² Iwán yéj temakas nochi yej tiktajtaniliáj, iga tikchiwaj ken yéj tatekimaka iwán tikchiwaj yej yéjpa kiye'ita. ²³ Dios tetekimaka iga maticredokan Jesucristo yej ipiltzimpa iwán matimosepanchokilikan ken yéj tatekimaka. ²⁴ Siga tikchiwaj ken yéj tetekimaka, tisetitoskej wan Dios, iwán Dios no setitos wan tejemen. Ijkin tikmatij iga tisetitokej wan Dios: iga iyEspíritoj yej yéj temá'.

4

Amo mamitzkajkawakan yej kijtowajki' iga Dios kimaka tájtól iga makijto

¹ Nokniwan yej nimitzpoxchokiliáj, amo xicredokan nochi inomej yej kijtowaj iga iyEspíritoj Dios kitajtolmakaj, sino que xikitakan siga inón espíritu yej ono' ipan yejemej, wi' de Dios o ayéj. Iga ipan inin tajli poxsan nemi piwij yej takajkawawaj, inomej yej ayéj mela'profetajmej* yej kijtowaj iga Dioski' tajtowa pan yejemen. ² Ijkón amejemen wel ankimatiskej a'yéj kipiá iyEspíritoj Dios: nochi yej kijtowa iga Jesucristo kipiá' icuerpoj ken nochi

* **4:1** 4:1 Xikita glosario "Profeta".

taga' kua' waka ipan tajli, inon kipiá iyEspíritoj Dios. ³ Nochi yej ayá' kijtowa iga Jesucristo kipiá' icuerpoj ken nochi taga' kua' waka ipan tajli, inon ayá' kipiá iyEspíritoj Dios; sino que kipiá iyespíritoj yej ayéj mela'Cristoj; yej amejemen ankimátija iga inon espíritu yawi witzeti, iwán inán óno'ya ipan inín tajli.

⁴ Nopilowan, amejemen itatki Dios iwán ankitanilíjkeja inomej yej ayéj mela'profetajmej, yej takajkayawaj, iga inon iyEspíritoj Dios yej ono' ipan amejemen máj weliti que inon espíritu yej ono' ipan inomej yej ayá' kichiwaj ken kineki toTeko. ⁵ Inomej yej takajkayawaj de inomejpa yej akitokaj toTeko, takajkayawaj kensan motekichíwa ipan inín tajli, inon iga sekin yej no akitokaj toTeko kitajtolkakij inomej yej ayéj mela'profetajmej. ⁶ E' tejemej itatki Dios. Yej kixmati Dios, tetajtolkaki, e' yej ayéj itatki Dios ayá' tetajtolkakij. Ijkón wel tikmatij a'yéj kipiá iyEspíritoj Dios yej atakajkayawa iwán a'yéj kipiá espíritu yej takajkayawa.

Dios nochipa tepochiliá

⁷ Nokniwan yej nimitzpoxchokiliáj, matimosepanchokilikán, iga Dios kichíwa iga wel matikchokilikán tokniwan. Nochi yej kichokiliá iyiknín, inon ipiltzín Dios iwán kixmati Dios. ⁸ E' yej ayá' kichokiliá iyiknín, inon ayá' kixmati Dios, iga Dios nochipa tepochiliá. ⁹ Dios kinextij iga tepoxchokiliá kua' kititan iselPiltzín ipan inín tajli, iga timoconfiarowaj pan yéj, nochipa tonoskej wan Dios. ¹⁰ Ipan inín nesi iga tepochiliá: ayéj iga tejemej tikpoxnekikej Dios,

sino que yéj tēchokilij iwán kititan iPiltzín iga yéj mamiki iga tejemej iga wel mateperdonarowili yej tejemej tikchijkej yej ayēkti.

¹¹ Nokniwan yej nimitzpochochokiliáj, siga Dios ijkón tēchokilij, tejemej no matimochokilikan.

¹² Dios ayagaj kita' nikēman; e' siga timosepanchokiliáj, Dios setito' iwán tejemej iwán tejemej tisetitokej wan yéj, iwán ijkón momela'nexitiá ken iga Dios tepoxchokiliá. ¹³ Ijkin tikmatij iga tisetitokej wan Dios iwán Dios setito' wan tejemej: iga iyEspíritoj yej yéj temá'. ¹⁴ Iwán nejemej nikitakej iwán niknojma-ijtowaj iga to-Taj kititan iPiltzín iga makisalvaro nochi gente. ¹⁵ Dios setito' wan nochi yej kinojma-ijtowa iga Jesús nokta iPiltzín Dios. Ijkón wel tisetitoskej wan Dios iwán Dios wan tejemej.

¹⁶ Tikmatij wan ticredowaj iga Dios tēchokiliá. Dios tēchokiliá, iwán yej kichokiliá iyiknin, setito' wan Dios, iwán Dios setito' wan yéj.

¹⁷ Siga melá' tikchokiliáj tokniwan iwán tikchijwaj ken kichij Jesucristo kuá' onoya ipan inin tajli, timochiwasjej kensan yéj ken iga tēchokiliá, iwán ayá' timajmawiskej kuá' Dios tajuzgaroj. ¹⁸ Yej kimati iga Dios kichokiliá, ayá' majmawi. Kuá' tikmatij iga Dios tepoxchokiliá, ni alín atimajmawij. Iga yej majmawi kimati iga Dios yawi kicastigaroti. Inón iga, si agaj majmawi, aya kimela'mati iga Dios kipoxchokiliá.

¹⁹ Tejemej tikchokiliáj Dios iwán tikchokiliáj tokniwan iga Dios achto tenegui'. ²⁰ Siga agaj kijtowa: “Nej nikchokiliá Dios”, e' kijiya

iyiknĭn, inón takajkayawa. Pues siga ayá' kichokiliá iyiknĭn yej wel kita, awel kichokiliá Dios yej ayá' kita. ²¹ Jesucristo ijkĭn te-ijliá iga matikchiwakan: Yej kichokiliá Dios, nō maki-chokili iyiknĭn.

5

Amo matikchiwakan ken yej akitokaj iyojwi toTēko

¹ Nochi yej kijtowa iga Jesús nokta in Cristo,* inón yej ijkón kijtowa ipiltzĭn Dios; iwán yej kichokiliá toTaj, nō kichokiliá ipilowan toTaj. ² Siga tiknekij Dios iwán tikchiwaj yej yéj kijtowa, tikmatij iga nō tikchokiliáj ipilowan Dios. ³ Yej kichokiliá toTaj, kichiwa ken toTaj tatekimaka iwán yej toTaj tētekimaka iga matikchiwakan, ayéj ken yej awel mochiwa. ⁴ Nochi yej ipilowampa Dios kitaniliá yej tēyoltilana yej ayēkti yej mochiwa pan inĭn tajli. Iga timoconfiarowaj ipan Jesús, ayá' tikchiwaj yej ayēkti ken kichiwaj yej ayá' kitokaj iyojwi toTēko. ⁵ Yej kicredowa iga Jesús ipiltzĭn Dios, inón kitaniliá yej tēyoltilana yej ayēkti yej mochiwa pan inĭn tajli, ken kichiwaj yej akitokaj iyojwi toTēko.

IyEspíritoj Dios kijtowa yej melá' nokta

⁶ Kuá' Jesucristo wálka ipan inĭn tajli, kiba-utizarojkej† pan a'ti, iwán kĭsa' iyesyō kuá' mi' ipan cruz. IyEspíritoj Dios tēnojma-ijliá nochi inĭn, wan inĭn Espíritu kijtowa yej melá' nokta. ⁷ Eyímejwa' in yej onokej ipan cielo

* **5:1** 5:1 Xikita glosario "Cristo". † **5:6** 5:6 Xikita glosario "Bautizar".

in yej tenojma-ijliáj: toTaj, Tájtoł wān el Espíritu Santo, iwán iyeyixtimej sansé kijtowaj. ⁸ Eyímejwa' in yej onokej ipan tajli in yej tenojma-ijliáj: el Espíritu, a'ti iwán esti, iwán iyeyixtimej sansé kijtowaj. ⁹ Siga wel ticredowaj yej kijtowaj tajtaga', majya sej valerowa yej kijtowa Dios, porque Dios kijtowa yej kichij iPiltzın. ¹⁰ Yej moconfiarowa ipan iPiltzın Dios ipan iyalmaj kicredowa yej Dios kijtowa; e' yej ayá' kicredowa Dios, inón kipantiá iga Dios takajkayawa, iga ayá' kicredowa yej Dios kijtoj de iPiltzın. ¹¹ Inınwa' in yej kijtoj Dios: iga yéj kichıwas iga nochipa tonoskej íwān, siga ticredowaj ipan Cristo wel nokta nochipa tonoskej íwān. ¹² Yej setito' wān iPiltzın Dios, yawi onoti nochipa íwān ipan cielo; e' yej ayá' setito' wān iPiltzın Dios, ayá' onos nochipa íwān.

Te iga mo-ijkuiloj inın ama'

¹³ Nimitzijkuilowiliá inın ama' amejemej yej anxicredowaj ipan iPiltzın Dios, iga xikmatıkanya iga nochipa amonoskej iwán yéj ipan cielo.

¹⁴ Timoconfiarowaj ipan Dios iga tikmatij iga kuá' tiktajtaniłáj yej yejpa kiye'ita, yéj tetajtołkaki. ¹⁵ Iwán tejemej tikmatij nokta iga Dios tekaki kuá' titajtowaj íwān; inón iga tikmatij iga tikpiaja yej tiktajtaniłijkej.

¹⁶ Siga agaj kita iga iyiknın kichijto' yej ayękti, yej weljo' moperdonarowa, makitajtanili Dios iga makipalewi, iwán Dios kichıwas iga inón toknın nochipa maono íwān ipan cielo. Nikijtowa inón siga kichij yej ayękti yej weljo'

moperdonarowa, iga ono' nokta yej mochiwa yej ayekti yej aweljo' moperdonarowa, iga inõmpa ayá' nikijtowa iga xiktajtanilikan Dios iga makipalewi. ¹⁷ Nochi yej mochiwa yej Dios ayá' kiye'ita, inõnwa' ayekti; e' ono' yej mochiwa yej ayekti yej weljo' moperdonarowa.

¹⁸ Tikmatij iga yej ipilowampa Dios ayo' kichijoskej yej ayekti. Porque iPiltzin Dios kicuidarowaj, iwán Tzitzimi' awel te kichiwiliáj.

¹⁹ Tikmatij iga tejemej tiktokaj Dios, e' nõ tikmatij iga yej ayá' kitokasnekij Dios, nochi yejemej Tzitzimi' kitekimakaj.

²⁰ Nõ tikmatij iga iPiltzin Dios walka, iwán yéj tenextilij iga matikmela'ixmatikan yej mela'Dios. Iwán tejemej tikixmatij iga tisen-onokej iwán Jesucristo yej iPiltzin. Yejwa' in mela'Dios yej kichiwa iga wel matonokan nochipa íwan. ²¹ Nopilowan, amo xiktokakan yej ayéj mela'Dios. Ijkónyawa'.

**Itájtōl toTēko ipan mela'tájtōl
Nahuatl, Isthmus-Mecayapan: Itájtōl toTēko ipan
mela'tájtōl New Testament**

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

8d5b6a33-8846-5c0f-ae8f-62c94f894f7b